

國  
朝  
詩  
鐸

國朝詩鐸卷十四

錢唐張應昌仲甫題

災荒總

憫荒二首

曹溶

寇禍烈茲土舉目無故觀百里一空城蓬蒿鬱相蟠村  
媪土中出肘肉傷凋殘生長不識布石灰煖我寒匍匐  
向前途力盡酸肺肝苦菜萌已晚采之不能餐撤屋備  
朝薪露處難久安邊境旣流離內地何由完 宸聰聽  
還卑討論窮衆端減賦息長徭萬方用騰懼

游民輕去鄉擔釜臥溝側未知何方好奔走昧南北無

乃吏政苛聊欲避所逼持檄疾招來計口給汝食誠恐  
失初心展轉成盜賊踉蹌返前村日影正曛黑面目半  
已改父子不相識勸汝秉鋤犁隴上栽黍稷婦女勿嬌  
惰軋軋當戶織壯者習彎弓努力衛邦國人事苟修持  
天道豈終極

逃亡屋

戈陸明

君不見日光黯淡沈虞谷江上蘆葦聲颼颼荒村寂若  
行邱墟寒煙自鎖逃亡屋白頭老叟向余言云昔居人  
皆富族槐柘陰中婦子嘻桑麻影裏兒童逐青溪弄白  
鷗綠野眠黃犢并稅甯煩縣吏催丁錢不用官家促白

日閒閒手足便涼風傲殺羲皇俗那知翻變只須臾頻  
年饑饉天何毒村中漸覺住人稀不獨淒涼空杼柚地  
因財盡故常荒田爲人窮偏不熟傾家未給吏胥船賣  
宅難償豪貴粟骨肉流離若轉蓬父出奔馳男在獄可  
憐有家不敢歸脫身無計憑雙足壯者雖生不欲存老  
兒得死翻爲福抱子頻來棄草間祇教送入飢烏腹請  
君坐爲君言君若聞之心亦酸安得駕白鹿安得驂青  
鸞直上蓬萊探大丹徙倚仙家十二欄不來人世求三  
餐鶴可擎竹可冠萬載千秋不見官流民圖卷應猶在  
送與君王仔細看

苦農行

濮滄

決渠引流車上田踏車老農真可憐  
大兒勤力代黃犢少婦餽饑孩  
提哭焉得傾盆雨一天方使老農伸脚眠  
問農老邁尙勞苦胼胝偃僕力何補  
老農答言淚如雨才鬻兒孫又孫女  
去年亢旱地裂拆稜粒無收死無策  
無衣無食到今年憔悴秋成望顏色  
何期晴晝如焚風揚電掣雷無聞  
昨日蒼蒼起陣雲山氣騰涌煙氤氳  
不知雨脚向何處又無涓滴沾微塵  
我聞老農語未止耳熱心驚愁裂眦  
四方多事斂正繁良吏未遑勤撫字  
人苦無田猶可生苦田不熟農必死

剝榆歌

魏象樞

黃沙日暮榆關路。烟火盡絕泥塞戶。路旁老翁攜稚兒。  
手持短鐵剝榆樹。我問剝榆何所爲。老翁倚馬哽咽悲。  
去歲死蝗前死寇。數千村落無子遺。蒼蒼不恤儂衰老。  
獨留餘生伴荒草。三日兩日乏再饘。不剝榆皮那能飽。  
榆皮療我飢。那惜榆無衣。我腹縱不果甯。教我兒肥嗟。  
乎此榆贍我父若子。日食其皮皮有幾。今朝有榆且剝。  
榆榆盡同來樹下死。老翁說罷我心摧。回視君門真  
萬里。

安宜行

孫蕙

安宜罹災亦云酷魚龍竟奪農夫屋千尋巨浪漫荒陲  
落日西風聞野哭水田一綫纔可耕勘荒使者責長牧  
征糧下令嚴催科不管貧家賣黃犢前年賣女歎伶仃  
今年賣兒更孤獨阿妻阿母還傭人豈但醫瘡與剜肉  
牽牛出門牛不行空腹哀鳴何穀觶低頭語牛牛且前  
官稅差完免鞭扑我聞此語增歎吁仰視皇天白日速  
嗚呼貧家母妻子女無還期誰能戀此卑官祿沈歸愚  
別裁注  
兒女既賣母妻傭人牽牛不行而空腹哀鳴  
官長忍加鞭扑耶無可奈何付之自責而已

河上居民采野蒿作食感賦

嚴我斯

黃河無定流狂波激大陸邳宿當其衝瀾漫蕩川谷不

見出與廬安望插種稔高原棲魚鼈丁男化鳩鵲哀哀  
老弱餘伶仃一路哭青青原上蒿采采不盈劑井里絕  
炊烟人家斷榆粥上天仁愛人留此充半菽奈何官長  
輩公然飽梁肉昨聞興大役下詔給口粟庶緩須臾  
死天心或可復又聞閭左兒三五逞馳逐不作溝洫魂  
漸滋蠶蠹毒咄嗟杞人憂中夜如轉轂紛紛下瀨船輓  
輸日已促民力困東南所憂在心腹安得事耕犁勗哉  
良守牧

麥雨歎

顏光敏

甯逢旱魃行莫見商羊舞小麥黃時饗田祖汗流肩頰

何太苦霏霏淫雨連三旬卻恨災曠在何所昨日飛蛾  
空麥頭今朝麥尾生黃牛麥中小蟲名嘉實幾日作糠粃長  
飢更待涼風秋勸農使者來省耘麥花布野揚苾芴豈  
知倉庾有災眚翻嗔野老多傳聞頻年屢歉蒙寬假秋  
來併命鞭箠下蛾兮牛兮何爲者覩然食我倉中粟何  
不往遮使君馬

青齊謠

王志琪

青齊號繁庶古來稱沃饒我來至臨淄所見何蕭條田  
疇悉汗萊草木皆枯焦沿回數百武積屍枕荒郊逆旅  
叩主人欲語涕泗拋爲言數年來千里無麥苗河流復

奔湍平地成波濤居人絕烟火朝夕藉藜蒿壯者走四方乞丐操團瓢老弱徒伶俜僵仆饑火燒復有不忍言人性非鴟梟割彼死者肉充此饑者枵君看狗彘食原隰塗腥臊烏鳶啄人腸飛挂枯樹梢昔此耕鑿氓擊壤歌唐堯伊誰視其死粟米資斗筲縣官頗刺促慟此哀鴻嗷啟請至軍門抑制在大僚災害乃偶爾奈何相喧呶至今幾閱月忍死誰呼號客聞主人語搔首心切切上天立民牧大吏麾旌旄民隱不上聞竊位恣貪饕帝鑒實在茲國憲容可逃終夜不能寐譜作青齊謠

揚州草

康熙庚戌十二月客揚州作○五首錄三

杜濬

揚州草不青復不黃百錢買一束難熱釜中湯有米之家亦無飯客子聞之仰天歎將薪比桂桂不如琪花瑤艸誠有諸

詩觀評揚郡草值甚貴庚戌冬尤甚此實譜其事

揚州炭

杜濬

揚州炭炭有汁渣無多汁滴瀝故人憐老翁買送風雪中呼兒然薪急煎炭炭未乾時薪已斷感君意氣肢體溫炭乾炭溼何足云

揚州春

杜濬

揚州春迎春自東郭盡道今年官作春先期三日行催索積雪泥深一尺餘倡婦挾瑟乘肩輿紅妝半露疏簾

真不知顏色還何如春日諸官宴綵幄此曹勸酒須唱  
曲請君但聽曲莫聽六街三市哭

顧彩記所見篇見催科門

晉饑行

沈名蓀

連年晉地天災行赤地千里無禾生榆皮柳葉盡取食  
餓殍仍見溝中盈遣官賑濟又何益官吏自肥民自瘠  
就令升合得到身苟且延生不終夕京師豪家費少錢  
大車小車載入關賣身不悲翻自喜夫甘棄妻父棄子  
縱爲奴婢亦不嫌猶勝家鄉卽日死

榆皮行

嚴啟煜

井廬無煙野無草萬戶罄罄缺一飽村南村北總成羣  
去剝榆皮行及早何人括盡榆莢錢枯榦只剩榆皮堅  
榆皮可食少官稅悔不種地成榆田枝頭聚雀泣相語  
新長嫩芽君莫取雀乎雀乎慎勿爭我輩舍榆方掘鼠

歲饑行

錄三首

楊端本

山村六百戶旱荒皆困窮吾巷五十家數家藜藿充餘  
者室縣罄朝夕絕殮饕少壯奔楚南餬口爲人傭丈夫  
捐妻孥兒孫棄嫗翁蕭條陋巷內竟日無人蹤顛運數  
老嫗曝背向日紅少婦面菜色飢餓拋女工稚子驅野  
外掘土覓菲葑斲剝榆樹皮背負盈筠籠日夕茅簷下

微煙動輕風木皮雜糠粃春搗釜中烘吁嗟冰雪寒凍  
餒當嚴冬所憂難卒歲何以盼年豐

清晨啟柴荆眺望至日西襜褕絡繹來流離四方走或  
牽兒女行或扶嫗與叟絮語遭旱蝗粒顆田無有老羸  
氣如絲拄杖露兩肘佼女形如鵠垢面蓬其首但祈須  
喫活得食遑恤苟昨傳賑恤詔 皇恩殊深厚吁嗟億  
兆繁烏能徧升斗况乃吏胥奸貧富昧分割飽肥市肆  
兒惠難逮畎畝吾聞 天子聖民瘼念星留奮然澄海  
字母恣橫索取庶幾歲豐登比屋皆康阜

日午臨大陌道路少行旅滾滾陌塵飛流亡難計數稚

孺滿柴車瘠蹇馱老姥朔風霜雪寒堅冰凍河浦哭號  
天爲昏悲哉此悽楚道傍一老翁頹衰形軀僂力竭經  
樹歇絮絮向我語泣訴旱三年高下枯徐黍家在渭水  
北土居百千戶田乾失播種逃亡十踰五富者稍足贍  
催科迫官府賦急毒如蛇政苛猛於虎倏忽富亦貧相  
率離鄉圃豈不念田廬棄置摧肺腑

榆樹行

邵長蘅

向容城邊古道旁榆樹千株萬株白枯榦僅存皮剝盡  
饑民慊慊春作屑雜以糠粃半和土食之喉澀腸腹結  
此事傳聞五十年卽今眼見增歎息去年大水波滔空

桑麻委折洪濤風今年大旱魃爲虐龜坼千里生蒿蓬  
告災頻遭縣官怒鞭撻不顧蒼黎窮煌煌 詔書屢寬  
恤上下一轍仍相蒙十年四海風塵起跋扈飛揚猶未  
已巴蜀荆南急鼓鼙東吳西浙成瘡痍往時民貧鬻兒  
女今年兒女鬻無處老翁路旁臥不起乞得一錢淚如  
雨高天漠漠寒雲橫槍側吞聲策馬去

六荒詩

吳中水災數載因作是詩樂天云見之切不覺言之直也

蔣廷錫

蠶荒

吳民事蠶絲燥溼惟時候今年三月前霖霖潤土厚蠶  
婦欣相告可保蠶有收有綿白如雪有絲細如縷曠風

國朝詩金 卷十四  
護蠶子蠶子衆且驟一線黑如針初眠已昂首誰知連  
旬雨桑枝爛若蹂重陰固微陽葉葉皮縮皺水氣毒中  
蠶蠶死首相湊蠶婦長歎泣相約毀絲扣

麥荒

春秋輕他穀無麥則書之所以古帝王勸種毋失時百  
穀最先登乏食惟賴茲每讀爾雅注麥者繼絕詞太陰  
傷首種常使農人飢油油數千頃空爛靡有遺大麥既  
淹死小麥亦披離農夫束手待野老吞聲悲一雨千萬  
淚天公胡不知

豆荒

西北多高田種花亦種豆夏至二十日播植惟其候刈  
草復治穢深耕還淺耨疎根欲其乾糞土欲其厚望莢  
成二七不先亦不後呂覽得時之豆其莢二七爲族誰知入五月雨下  
大且驟豆苗未盈寸披靡倒若蹂水浸及溼蒸空敗不  
可救縣連勢更甚長草如長寇。屨水倏復盈築岍旋已  
仆浩歌南山詩酌酒聊自侑

秧荒

栽秧纔三寸短小未成禾往年小暑前青青已分科何  
當今年荒秧頭翻白波乍如澗中草又如水底荷恍疑  
江漲發洪濤沒綠莎吾從田間來見之發咄嗟好雨不

破塊和風不殺芽而此何降災豈是民奇衰

米荒

十九水災後去歲稱大熟米粒淨如珠米價賤於肉雖  
無九年儲亦有一歲蓄胡爲連雨後窮民已空腹野老  
爲余言君何不三復去年穀未登有吏催納粟三日一  
程限五日一鞭扑颺簸粒粒圓兩斛當一斛猶慮不中  
納難入官吏目終冬官報計征科十分足上官見之喜  
賢哉此民牧。

柴荒

庭中多草萊階下多松竹朝取炊晨餐夜拾煮夕粥松

竹易以盡草萊生不足朝持百錢去暮還易一束溼重  
不可燒漉米不能熟八口望曲突磬磬歎枵腹前月山  
中行山木猶簇簇今從山下過遙望山尖禿農民無以  
爨焚卻水車軸田事更無望拆屋入城鬻鬻之富貴家  
可以爛魚肉。

劉青藜稗子行見米穀門

母抱兒

鄭世元

母抱兒兒在懷中啼我兒且勿啼村中榆樹剝盡皮三  
日不食氣一絲那得有乳哺汝飢抱兒出門去負兒行  
道周不知東西與南北仰面乞食低面羞行人來往各

恫恫誰能救汝母子命

飢口行

夏之蓉

孤村如荒墟四圍皆積水奉檄勘飢民觸眼見瘡痍里  
長呈戶冊牽率來拜跼鰥兒案前扶掖不得起逡巡  
入其室破屋半傾圯牀上飢兒啼伊嚶聲未已瘦妻布  
裏頭着腳無完履冷白蓄何物云是蕨其子腐惡令人  
嘔賴此得不死誰云人命重。僅與螻蟻比。聞之尙酸鼻  
見者應頹泚

哀飢民

陳章

哀飢民哀飢民夏秋淫雨連朝昏稻花不實爛稻根淮

流泛溢魚龍奔尺椽片瓦蕩如焚流離四散長城闔門  
卒呵止還鄉村道遇一老嫗泣告聲已吞一家十三口  
只有兩老存寒風急雪又作櫃肩背不掩無完裙殘喘  
不知更幾日乞得薄粥猶相分東家賣兒女價賤同雞  
豚西家死父母隨地埋荆榛哀哀此赤子誰非 聖代  
民 九重恩詔昨日下午繪圖不必煩監門

竹米歎

周京

己丑六月之中旬傳聞竹米紛干困淫騰斗斛若米價  
會須一療飢虛人籍籍爭看盈把握長腰細粒如搥削  
云本徑寸垂琅玕黑黍黃粱雜相錯亦用碓舂去翳膚

軟滑如秫高粳稌撐腸挂腹不充飽蒸浮徒說供朝舖  
會聞益州不足異江浙徵荒衆驚悸一年大旱苗稼枯  
一年大水少晴霽今年正復心皇皇鳩形鵠面兒扶爨  
訛言竹米是荒兆愁聲怨氣羣徬徨那能乞取安心方  
吁嗟乎那能乞取安心方

白土餅

卽俗名  
觀音粉

程穆衡

白土本卽山中泥愚民美號觀音粉和以堇苴作糗餌  
珍同資饑充飢吻有從道畔攫其一入口欲趨行不疾  
市者相爭推仆地齒噙其半命隨畢一人後至顧其頤  
挾諸死口急咽之旁有一人不得嘗失聲一慟顛而僵

自冬徂春數月來道殣累累埋塵埃史書亙古志荒旱  
未見如斯劇塗炭嗚呼我欲竟此曲多恐酸風襲几案  
苦災行

袁枚

沐陽八年災往歲尤爲酷我適涖此邦一望徒陵谷田  
廬化爲沼春燕巢林木泛濫有魚頭彭亨無豕腹百死  
猶可忍餓死苦不速野狗銜髑體骨瘦亦無肉自恨作  
父母不願生耳目賴有 皇帝仁施糧更煮粥飢口三  
十萬鴻恩無不沐望此一月賑早作千回卜攜筐及老  
幼守候合宗族恩愛如夫妻爭糧相搏逐奪取未到懷  
擔起還愁覆有賑尙如此無賑作何局爲一校算之愧

然眉欲蹙小口米七升大口斗三六將度期月餘日食  
無一掬國帑已千萬再加苦不足紓國更紓民東  
手難營度甯死不爲寇猶賴皇恩渥豈無冒濫譏終  
爲百姓福只期今歲麥得雨早成熟千瘡百孔問元氣  
稍周續旱魃竟爲災秋陽永相暴春禾山下焦夏麥土  
中縮聞雷妒彼縣望雲生我屋水去旱又來陰陽太慘  
毒父母殺子孫胡不悔生育萬物本天地胡爲窮殺戮  
人心尙悔禍天道應剝復下吏或當誅百姓有何惡取  
我辨香來朝夕向天祝上念堯舜仁下念父老哭急命  
行雨龍及早施霖霖雖已無麥禾猶可救種種貧家何

所言雨水卽雨穀富家何所言得雨如得玉永誌喜雨  
亭稽首謝天祿

山左道中

胡旭

我行山之東乞兒擁如蜂攀轅不肯放哀聲上蒼穹問  
渠果何欲所求一文足一文亦安爲不絕命如續薄命  
螻蟻輕遲速理亦平但免今日死焉知明日生君不見  
溝中之瘠何纍纍今爲乞鬼昨乞兒嗚呼東家生牛笑  
西家死驢哭老弱餓死何人埋眈眈狗豕啖其肉

賣牛圖歌

蔣士銓

田乾無處用牛力田家不忍殺牛食完糧要錢不要牛

賣人不及牛身值。人牛餓死爭蚤遲。且換死別爲生離。  
牛別牛宮不復返。全家哭送牛何之。相依日久同留戀。  
雖受鞭笞牛不怨。殺身有補拌酬恩。奈何只賣錢三貫。  
皇天生牛任至勞。餓鬼劫到不可逃。鬼神豈不惜牛命。  
凶年棄去同秋毫。菩薩心腸聖賢手。畫之詠之亦何有。  
君不見安居骨肉每。此離何況飢寒難共守。

又士銓典牛歌見善政門

振災篇

湖彭蠡澤曰民築圩衛田乾隆丁亥夏秋  
間積潦衝決中以聞荷蒙振卹自勘

災迄普振凡六閱月追思  
致災有由備患宜早作詩紀之

張九鉞

民飢在波濤。吏飽坐堂廡。藉曰案牘繁。何以對肺腑。分

官臥嬾蠶遺吏助翼虎豈無舊冊稽常恐影射苦何如  
遵履畝瘡痍手摩撫

皇心調玉燭宵旰念入方痼瘵一上聞惠澤下九閭區  
區此偏隅稊米出太倉天膏不少屯慎毋去其鄉豐歉  
偶然事所重耕與桑

小魚戀煦沫伺之者鸛鶴哀鴻霑稻梁旁有狙鷹攫一  
圩一長踞一圩一隸嚼戶口既侵漁雞豚苦烹捉窮民  
替替啼不得分升命刈莠長嘉禾毋使禾恨削

寒風縮湖波煙火茅茨高雞犬飽嬉隄婦子傾新醪飛  
符集畚鍤伐鉦復鼓警防患豫綢繆安可事逍遙明年

歲困敦土脉早發膏。皇恩雖寬大未可長倖邀。

饑民船

戊辰秦州水災飄沒廬舍飢民以船爲家勘災往來大水中見而悲之

湯禮祥

饑民船何連連船頭乞食船尾眠自從六月遭大水性命孤懸一船裏船有時而南船有時而北有時中流風怒號大船小船行不得行不得泊何許後村已過前村遙浪花如雪淚如雨

土銜行

張雲璈

寒風北來雨點急荒村矮屋黃茅溼頭白老翁土銜炊眯眼煙飛欲成泣行人下馬立道旁試問此地何荒涼

翁言連年遭歲歉皇天不憫民之殃去秋淫潦滿鄉縣  
高陵平地波濤遍嗷嗷中澤聽哀鴻鄭俠圖中昔曾見  
朝廷恩重念民依議賑但願天下肥一家走領一升粟  
一升且免一日飢我聞茲語淚如綆老翁勸言勿悲哽  
有餐猶足飽餘生君不見前村無人士銕冷。

賣餅行

錢世錫

茶鑪賣餅官道傍鑪頭餅焦芝麻香客行過午腹已餓  
買餅頗嫌餅不大怒問餅師胡爲然椎餅不大如月圓  
往年一餅已半飽今胡縮餅如錢小餅師笑客何其癡  
不見麥隴黃埃吹客食我餅亦已幸但得麥禾熟淮潁

浩浩穰穰百千頃，何難餅大與盤等。明年若更如今年，直恐鑪頭竟無餅。

哀鴻詩二首

曾煥

哀鴻不得食，逝彼天一方。努力將其雛，終焉棄道傍。豈無顧復意，自念就死傷。同死不忍見，見之摧心腸。不如姑棄置，萬一生可望。其雛宛轉鳴，四野爲悽愴。

哀鴻不得食，餓死在林麓。旁復有羣鴻，餐此死者肉。豈不傷其類，生者暫充腹。亦知久不免，道路且相續。

江北薦饑流亡相繼惻然有作

顧敏恆

踟躕城之隅，還顧望道周。纍纍數十人，蓬垢如係囚。借

問爾何爲旱魃爲我仇沃壤成石田十種無一收骨月  
半死亡殘骸委荒邱伶仃去鄉土樂國甘所投逢人強  
拜跪干請不領頭枵腹不能語吞聲故伊憂愧無困倉  
積紓爾朝夕憂三詠鴻雁詩泣然悲涕流

江南歲方旱祈請走顛蹶豈無良田疇大半輟耕堡貧  
民典鬻盡富者曷攘奪比屋鮮蓋藏何以免倉卒嗟爾  
遠地人所至罹酷罰暮宿無栖止晨餐乃糠粃孰知溝  
渠填尚冀旦夕活翻羨豪家犬飽食臥門闥命也可奈  
何思之爲心但

乞米婦

王芑孫

乞米婦形樂樂與錢不肯受乞米聲悲酸兩年水災蕩  
廬屋三年旱荒斷食穀生兒四歲良獨苦長食樹皮少  
食乳可憐不曾識米味安得香杭洗其胃官今與米歸  
作湯不與飽食聊與嘗

宿遷民

劉鳳誥

我行宿遷城下無水聲我行宿遷野野外草不春水  
聲學人哭草根掘人肉土民辨男女骨節三百六云昨  
歲苦饑百口無一肥母懷割幼子父或餐其兒髓乾血  
亦竭腸胃供餉糜死者勿復道生者猶僵屍至今十家  
屋九家穴狐狸我聞坐路旁忿怒交怨悲凶荒滅天性

區區殘喘爲土民止我淚勸我生笑嘻去年少人走今年有人啼漸比黃犢來莫厭烏鴉飛請告邦大夫拯災乘未危

掘草根

哀飢民也歲辛未吾婺大旱民掘草根以食

王惟孫

朝掘草根暮掘草根腸枯欲斷相向聲吞室有老穉飢餓不能出門奄奄待絕莫由博一餐風吹草號日色昏望見隔城燈火高樓大戶誰之屋奚奴喂馬槽中尙餘芻粟以手掬之遭鞭扑側足路旁淚漉漉

分餅行

羅懷玉

君不見乙巳年旱東海濱市中麥餅席上珍一餅之值

錢二文愁殺市中買餅人買餅人誰最苦海邊嗷嗷饑  
竈戶竈戶饑難忍逃亡棄桑梓左攜妻右挈子三人逐  
逐風塵裏腰纏祇四錢人維三錢維四錢來市得麥餅  
二人多餅寡分難均可憐婦也分餅費踟躕多寡準以  
尊卑殊全持一餅奉丈夫其餘一餅中剖析半留已餐  
半兒食兒幼則何知食不滿腹仍啼饑母心愴惻憐飢  
兒更以半餅療兒啼兒啼猶未已母遽飢餓死未見餓  
妻死憐妻怒責子隨手加鞭箠鞭箠手誤傷孱弱足難  
立顛仆子又亡夫見妻子死轉嗔爲詫悔且哀榮榮原  
野依蒿萊不聞子喚爺聲妻隨夫後但見夕陽下地悲

風來夫也自言自裁此身生世胡爲哉鬼伯西應聲河  
伯東招手濟人甘水無溺人鹹水有夫也懷石投其中  
吁嗟殘喘其能久狐兔過之爲卻走飛鴻望見哀叫迴  
翔二餅殺三口一門橫道旁分餅行斷人腸

諸葉粥

楊光鐸

湖南一十三州府官民籲天天不雨白日流丹夏及秋  
不旱之邑十無五頗聞民間言旱災岳屬平江旱尤苦  
平江田少多山邱田旣無穫山何求南箕不簸斗不挹  
富民不貸貧民愁兒嘯妻飢艱仰屋典盡寒衣賣黃犢  
舉家依舊持枵腹催科吏來無酒漿惟有一甌諸葉粥

諸空有葉根無。諸山中。諸葉皆已枯。今年葉枯猶可茹。來春諸葉粥亦無。

采葛行

又

朝采葛暮采葛。采葛深山忍饑渴。手皴足繭不知疲。絕壑窮涯討生活。采葛歸來不滿擔。千鍾萬杵膠泥黏。清水池漚漬清粉。雜以野菜味亦甘。荒年但求免飢餓。豈敢一飽窮饕餮。朝采東山嶺。暮采西山麓。老攜幼負朝朝暮暮。一望童山光。歷碌東隣西舍。悄無言。饑來惟向山頭哭。酸風苦雨空山阿。烏虜饑民奈爾何。爾家有吏來催科。

剗草行

樂鈞

晴沙揚空日皜皜沙上停舟見野老肌消如腊骨如柴  
手柄長鑿剗枯草試問野老何辛勤悽然向我訴懷抱  
水濱地狹田土磽歲豐才得半年飽河水易漲仍易乾  
三年兩年苦旱潦早禾已遭霖雨爛晚稼將逐秋陽槁  
僻壤偏災官不知統報收成十分早昨聞縣胥領官帖  
遍征租賦下鄉堡到門誦喝雞犬驚官糧那能略減少  
君看破屋餘半間風吹拉拉欲傾倒亦無男女堪賣錢  
只有乞食白頭媪西家稚子如饑鼠東隣老父似凍鳥  
夜來聚語相酸辛生死誰能復自保終拚一身聽吏捉

縣宰賢明可訴禱凶荒如此宜見憐弗憐亦甘受榜拷  
剗草且作燒畬計不死更望來歲好

觀音土行

又

豐年無錢人食苦凶年無錢人食土和糠作餅菜作羹  
充腸不及官倉鼠此土尋常曾不生飢人競以觀音名  
云是菩薩所潛賜楊枝灑地甘如飴吁嗟乎富家有土  
連郊垆富家有米如坻京米價日昂不肯糶坐視餓殍  
填溝塍此土幸出觀音力不費一錢能飽食救荒已賴  
佛慈悲莫向富翁苦啾唧。

荒年雜詩

焦循

三月無雨種四月無雨栽昨宵雨若鎬猛至驅塵埃東  
隣摘野蕨西隣時園菜葉黃蝨野蕨根傾頽

采采山上榆榆皮剝已盡采采墓門茅茅根不堪吮干  
錢二斗粟百錢二斗糠賣衣買糠食兒女賣牛買粟供  
耶孃無牛何以耕無衣何以煖休問何以耕休問何以  
煖未必秋冬時一家猶在屋

未死不忍殺已死不必覆出我囊中刀割彼身上肉瓦  
甗燒枯苗煎煎半生熟羸瘠無脂膏和以山溪菽生者  
如可救死者亦甘服此卽妻與孥一嚙一號哭哭者聲  
未收滿體乍寒縮少刻氣亦絕又填他人腹

稚子啼路旁，哀哀歲六七。問兒何爲啼，不食已二日。昨從阿耶來，今早阿耶去。言去乞水漿，置兒臥此處。行者憐其孤，攜歸備驅馭。餓久腸胃枯，不堪任充飫。

縣令乘車來，省視災與饑。蠕蠕村中民，匍匐前致詞。形骸骨立語，孱弱長官救。我呼聲遲，長官向民語。爾衆勿傷悲，一日告大府。三日奏天墀，有錢買新絮。有米炊香糜，事無十日遠。少俟無遷移，蠕蠕村中民。匍匐稱仁，慈拜送長官去。相顧形嬉嬉。

富人有長者，捐米施饑粥。架椽環數畝，邑宰坐中屋。嗶啄桑中蠶，旁午散南北。家有父與母，老病久枵腹。哀告

給半筐將歸救窮蹙

潘際雲蕎麥歌見米穀門

萋萋芽

周濟

女兒隨孃男隨爺出門去掘萋萋芽淤地芽多沙地少  
傾筐未盈日已斜道旁行人不解事道是采藥供醫家  
駐馬一問訊欲言涕墮紛如麻頻年赤旱苗盡槁今秋  
淫雨敗我吉貝花雨中况有賊竊發縣官走死民遭殺  
流離半月晝夜驚得脫餘生才一髮幸遇劉青天日日  
載米來鄉間日長米少不敢食留度荒春難復難掘取  
萋萋芽歸作萋萋粥亂掩柴門相抱宿天不雪無麥苗

天若雪眼前凍死何處逃只今世上無鄭俠 聖王安  
知鴻雁鳴磬啓

災農謠 咸豐丙辰

陸費瓌

丙辰夏徂秋驕陽煽威力大田圻龜兆尺土無寸溼良  
苗盡槁死捆束委荆棘徒憐手足焦車戽不遑息田父  
敢怨咨搔首向天泣樗皮屑作糜長藿恣采食羸弱轉  
溝渠存者面薰黑忽驚臺符下軍儲催孔亟有司急奉  
行徵歛事驅逼里胥夜打門叫怒入人室持鞭索酒漿  
瞋目肆呼叱搜括及盆盎皮肉任扑捩恭聞寬大 詔  
蠲緩務存恤召胥固時艱毋患亦吏職所嗟凋瘵餘補

救恐無術要惟慈惠師勤求勸耕織痾瘵汜小休噉鴻  
得安集感諷春陵行呻吟我心惻

沿途見餓殍

萬開燧

道經南陽地暫停向北轅瞥見野坡下鴉雀爭噪喧羣  
犬恣狂噬口銜髑髏奔奴子下車視云是餓殍存我聞  
誠不忍悲咽潛自吞欲爲謀片土過客誰與論歎息仍  
前去沿途所見繁哀哉誰氏子委棄荒野村豈無做惟  
念將爾蒲莞純忍教填溝壑視同待割豚肢體半狼藉  
白日慘欲昏仁人惻然念目胸心重捫遺骸雖至賤與  
我本一原側聞此地饑連歲掘草根半菽且不飽誰與

謀饗殮 皇仁亟振卹全活良甚蕃祇此澤骨遺難與  
達重闈所賴良有司視此流離魂不惜一坏土爲建漏  
澤園伏屍無暴露沴厲不爲冤馴致年穀登時和候復  
溫民生庶有瘳重回寒谷暄何人采輶軒我願獻此言

救荒新樂府五首

嘉慶十八載吾吳自五月不雨  
至于八月米價騰湧民不能支

仰賴

天子聖仁大府慈惠牧伯盡職吏民趨  
事於救荒法行之靡遺惲黎全活無算余以郡

人從史官之後有風喻之職因  
舉荒政之最善者各爲一篇

吳慈鶴

平糶

憶昨歲在奎江南苦無雨幾疑衆川竭赤子困車辱人  
有焦爛痕苗死固其所斗米價五百貧者將安取後村

聞死喪前村鬻子女節度賢相公憂民涕垂纓飛書告  
父老各各貸釜庾升合減數錢官私禁儲貯直減市亦  
平散利真善予常平古良法實政欣已舉可憐溝中瘠  
如兒今得乳

採買

吳田七百萬豐歲三鬴餘其二納官賦其半入家租閭  
闔百萬家九州稱大都計口十倍之歲食固不敷賴有  
洞庭商吾鄉米商多東西洞庭人川楚下舳艫豐歲仰鄰食歉歲更  
何如況此久旱後我民已交瘡糠粃且難得焉能求桂  
珠相公賢且仁飛檄江與湖復募富民往攜貲行轉輸

關津無譏禁萬里皆坦途不復平其值但求通粟儲昨  
過澣墅頭大艚若鯨吐風濤接尾至晷刻曾不踰嗚呼  
饑得食能使瘠化腴何以祝相公壽愷身樂胥

勸捐

保富國有經安貧乃良策盜賊貧所爲錢刀富所惜饑  
來思握粟寒至將求帛况值薦臻年焉能守程尺強者  
已可哀弱者尤可惻盜賊且不能甘心死荆棘人豈無  
仁術對此詎能適兩府進吏民不惜萬言說誠極動豚  
魚欣皆出私積富家一顆粒貧家終歲食綢繆麥秋前  
可以安保息

賑錢

救荒積陳言行糜本周令所嫌衝寒人勞餓轉成病聞  
之故老云饑疫兩相應揆理或此由收絃仗新政邦伯  
采蕘言簿錄勞里正人日授數錢月頒如俸請數坊一  
場廨近取非遠競事簡責耆年法周絕漁橫所給雖不  
多聊堪佐傭倩春風盪柔和鳩鵲轉相慶不分溝壑餘  
欣然得生更

醫藥

我民苦無食有食亦糠糝我民苦無衣有衣亦菅藁肝  
腸沸能裂冰雪僵斷指可憐免死身疾癘焉能已溫風

鬪餘診六氣傷滕理戶戶有呻吟家家苦鞭瘡邑侯心  
惻然誓欲起羸做羣醫畢關召百藥親飭庀疾輕就醫  
來重者醫往視匪獨昇苓朮還將哺湯餌行之兩月餘  
民皆大歡喜億兆瘼蠡消青詞謝天祉

突無煙

徐謙

突無煙白無穀野雀啄蟲充空腹碩鼠呼羣走隣屋紅  
米一石青蚨七千傭工三日不滿百錢富戶不開倉米  
店閉街坊無錢猶可無米殺我屈指新穀期尙遠忍饑  
車水輪不轉

剝榆歌

歲饑沁源貧民剝榆而食作是詩哀之

王省山

朝剝榆皮暮剝榆皮手持斧柯身困腹饑道旁纍纍不  
忍覩老幼相攜面如土家貧歲荒不得食聊借榆皮充  
肺腑吁嗟乎山中榆樹能有幾剝盡榆皮榆樹死荒村  
破屋半逃亡何處叫闔天萬里

歲歉感懷

吳振棫

吳楚傷心雨江湖極目波相逢聞太息卒歲更如何積  
漲龜魚喜寒源鴻雁多方知飽粗糲米可動悲歌  
井竈依稀在妻孥轉徙遙人生賤於草米價長如潮良  
吏憐糠餅空田少麥苗微聞兩黃鵠新唱後陂謠

三郡悲秋潦

杭嘉湖被水最甚

京坻始願違兒唄寒具小市怪

醉人稀輸粟方求糴餐藜且忍饑寄言僵臥好去此欲  
何依

蕭瑟若溪上驚危狴戶餘已寬沈命法願讀活民書呼  
籲情原迫倉皇計亦疏仰懷虞內史私米恤窮閭

豈用封椿積惟憂郡國荒况通西極馬早射北星狼使  
節巡行遠詩 命使臣訪  
察淮揚災區 蠹臣賑郵詳古來無旱澇何

以見 堯湯

哀鴻歎道光辛卯夏江西湖南北水災男  
女數十萬轉徙道路死者枕藉

郭儀霄

九江關外愁雲低二十億萬災黎棲炊無粒米寒無衣

黃瘦老弱挾女妻願從君子資舖糜爲奴爲妾隨所宜  
青錢至寶人沙泥 天子軫念恩沛施帑金浩費飽無  
時

蟻聚蜂屯塞道路今日此村明日去衝風臥雨暴霧露  
長官倡勸賑粥米惡膏澆粥添白水今日飽餐明日死  
城中得粥猶可全窮鄉僻壤安得前君不見老弱病劇  
不及顧半死半生縛在樹

江西災黎可痛惜楚南楚北尤堪惻我舟經過岳陽城  
饑民枕藉日數百君不見小兒伏地僵不起行者過之  
不忍視又不見蒲席裹尸同一繫中有餓兒猶有氣鳴

呼流離半死亡不如忍餓還故鄉故鄉陳陳多新鬼骨  
肉猶同一處死

饑民逃荒求苟活奸民乘機肆劫奪不殺奸民將焉出  
江湖夥盜日猖狂霜刀黑夜蜂入堂搜箱倒篋誰敢藏  
救荒自古無長策請自荏苒清盜賊亂絲當斬何足惜  
東里火烈仍恩澤

塔山犬

許乃穀

塔山犬臥蒼巖朝朝大嚼肉一鬻人不得食犬何能腆  
人非穀兮不生犬得人乃飽噉山前人死人不收山後  
鬼哭聲啾啾殘絲斷魂猶望救犬早磨牙坐相守

翁無妻

姚柬之

大巫小巫舞皇舞禱靈雨兮河之濟赤烏萬里雲不生  
舞折靈旗擊敗鼓老翁出門心躊躇高禾大芋皆乾枯  
膏腴百畝盡荆棘入門含淚觀妻孥夜半虎胥持虎符  
槌門大叫來催租道言蠲賑待明詔且索爾租紓我逋  
老翁聞言心膽憎老妻魂魄飛天外脫襦換酒衣換菜  
虎胥食之追不貸夫言我死追可輕妻言我鬻君可生  
夫言鬻汝我不忍妻言我去君可憫不爾今朝命同隕  
夜靜無言淚斷續天明牽向街頭鬻可憐老婦價不值  
又添一女顏如玉道旁觀者黯然悲 皇仁百萬療民

饑嗚呼 皇仁百萬療民饑老翁今歲猶無妻

偏災行

彭兆蓀

偏災屬旱非潦蝗近水得收遠水荒荒田果荒荒有數  
有田不荒荒可作去聲 朝廷恩意官長法卻使奸胥飽  
筐篋申荒誰里正口注荒誰吏人手荒田無錢田不荒  
作荒有錢免辦糧勘荒縱有神明宰一一安能免欺給  
偏災由來降自天誰知偏中復有偏偏災人乃分天權  
偏災賑災弊益多嗚呼全災更若何

賣牛謠

朱穀昌

高田低田浪花白蛟龍磨牙食人食一束稻草論錢百

牛兮雖飢救不得。荒年之草貴於寶。荒年之牛不如草。  
不能養牛將賣牛。牛主牽牛雙淚流。今年有牛飽人腹。  
明年無牛將無粟。人牛相倚不救死。牛去田荒死亦續。  
我語牛主且勿悲。不見路旁飢婦泣賣兒。

愁鴻篇

朱 綬

秋風聲蕭蕭。四野愁鴻號。愁鴻聲不止。秋風吹不已。田  
廬汨洪波。驚飛雨中起。故巢易漂搖。新巢難料理。孤雛  
棄草間。須臾綏吾死。忍死亦須臾。哀鳴淚如泚。安得此  
哀鳴。吹入長官耳。長官若不聞。民命終已矣。

道瑾謠

又

腹中無飯昏復晨  
蒼南巷北多死人  
籬條一肩棄荒野  
啄肉烏鳶飛欲下  
公然社鬼白晝行  
家家升屋招魂聲  
朝聞隣牆雨打破  
地上一家方藁臥

愍災詩六首

道光甲申冬高堰十三堡決後以次繕完禦黃壩堵閉兩年丙戌夏洪澤

湖水長當事懼隄工不保遂啟五壩過水揚郡七州縣當下游者田廬盡沒較嘉慶丙寅決荷花塘害尤劇余客海陵人烟蕭寥萬室波蕩加之盲風怪雨無節解悽慘之懷寫流離之狀因事命歌焉

開壩行

曹霖堅

今年稻好尙未收  
洪湖水長日夜流  
治河使者計無奈  
五壩不開隄要壞  
車邏開尙可昭關  
壩開淹殺我昨日

文書來六月三十申時開一尺二尺水頭縮千家萬家  
父老哭

搶稻行

又

低田水沒項高田水沒腰半熟不熟割稻苗水中撈摸  
十去九鎌刀傷人血滿手生稻不成米熟稻一把無官  
說今年不要租難得稻頭一兩寸留作糲兒粥幾頓厝  
麥爲粉煮以爲粥秦人謂之糲兒粥音采願天活民水早退茫茫不辨東  
西界搶得稻米無處曬

破圩行

又

倉皇出門告田主前後圩田要加土主人已費十百千

農夫解衣還質錢兩手撈泥泥漉漉一斗黃泥米一斛  
走圩東走圩西太陽初出雞又啼手僵腳腫不覺飢大  
家保護半月功寒天有米到腹中但願日日東南風東  
風不來西風大前圩後圩一齊破

賣牛行

又

牧童面色如死灰十牛五牛穀鯨來今宵牽向城外宿  
城裏明朝喫牛肉牛兮食我草牛兮耕我田無田無草  
那養汝養汝那得到春天夜半餵牛對牛哭牽牛進城  
牛有犢牛乎爾勿怨我語與汝賣汝得錢能幾許有  
男賣男女賣女

拆屋行

又

水連牀牀連屋大兒小兒盡匍匐牀前浙米牀上炊那  
有乾薪一兩束黑夜沈沈兒墮水夫叫妻號救兒起不  
聞兒啼兒已死鄰家有小船兒女安穩眠我家無船屋  
裏住水來更向何處去不如拆屋取屋材粗末細桷併  
一堆兩頭用繩縛作筏漂東漂西波汨汨未定一家誰  
死活

查災行

又

雞毛文書駱驛催明日官府來查災四邊汪洋天一色  
挂起風帆向西北某邨某落在何處惟見墳頭三兩樹

父老叩頭言聽得官府喚天災流行那敢怨官府親來  
百姓願當今皇帝大聖人頒發國帑救我民白金  
萬兩錢萬緡兩大口三小口官府莫交胥吏手

災民歎

五首

黃燮清

客從兗州來野殍紛相屬徐泗更蕭條道路不忍目白  
骨沿縱橫零殘手與足村荒狗彘餓嬌尾食人肉嗟爾  
何貪饕爾非民不畜民饑不爾食民死飽爾腹民瘠難  
更甦爾肥豈能獨食盡欲何依早晚同溝瀆

阿弟猶襁抱阿兄四五齡阿弟已餓死阿兄匍匐行狗  
來食弟肉還復視阿兄明知與鬼伍見慣亦不驚饑寒

父母棄軀命蠖蟻輕吁嗟絛袴兒梁棗方紛爭

驅車嶧陽道村寒少人烟老穉什伯羣雜選擁馬前見  
客相叫號宛轉乞一錢得錢豈救死殘喘冀苟延禱  
誰家婦長跪官道邊手指所生兒願隨耶執鞭割愛詎  
不痛良勝墮九泉呼兒坐轅上瑟縮吁可憐阿母顧兒  
喜謂免溝壑填亦知死離別撒手翻欣然羣兒不得偕  
躑躅思迫攀路長哭聲遠悲風與迴旋

濺濺順河流娟娟河上女哀哀向我啼絲絲淚如雨自  
言良家子嬌小守房戶低徊阿母旁未識飢寒苦自從  
黃河災有田不種黍阿母老更病三日火未舉骸骨滿

郊原兒死何足數一死固尋常誰來飼阿母聞言心骨  
悲未忍噉蹴與解囊供一餐旦夕竟何補

野店倚落日下馬入草堂主人肅客坐竭蹶羅酒漿苦  
言草具惡一水三年荒不見凍餒骨纍纍棄道旁皇  
心憫饑溺日月照流亡不惜內府金艱難恤夷傷聖  
人覆幬恩原期民物康百萬輕一擲豈意雪沃湯彌縫  
及乾沒何由知其詳煩冤滿道路誰能達九闔野草  
久不青邊問黍與梁粗糲幸得備且復盡一觴舉酒勸  
主人甞勉爲善良西南方用兵膏血飽虎狼此鄉雖困  
苦猶喜免斧斨時艱樂土少憂端兩茫茫

停質庫

紀兩災樂  
府之

高學沅

贖者五質者十厚其息減其直質者百贖者一但有出  
無復入盈千累萬稱貸益欲更質之無可質流民索米  
嗷嗷集官吏催賑咄咄逼欲閉不能勢逾亟誰家豪右  
擁萬緡金玉服玩盈牀茵棚民耽耽夜斬門席卷百貨  
無一存噫嘻樂歲攘效尙如此何況今年饑欲死

鬧荒

吳世涵

閉糶乃惡富鬧荒亦奸民奸民何爲者一二無賴人平  
時旣橫恣睚眦在鄉鄰一旦遇歲歉乘勢煽諸貧號召  
百十輩徒侶來僦僦武斷市上價搜索人家困旣以洩

其忿兼可肥厥身衆人米未糴奸人已千緡衆人腹未飽奸民酒肴陳事勢偶相激搶奪遂紛綸救荒在安衆貧富情皆均閉糶貧民懼禁閉令宜申鬧荒富民恐止鬧非無因此輩弗懲創釀禍豈爲仁

道光癸巳書事八勸歌

湯國泰

道旁婦 勸凶荒宜恤鰥寡也

道旁婦苦又苦鵠面鳩形衣襤褸饑寒兒女泣呱呱霜雪風中頻索乳腴顏欲作富家奴主不相容挈兒女思賣兒女活已命肉剜心頭難操刃自甘同死怕生離搔首空把青天問

路旁兒 勸饑饉宜矜孤獨也

去冬賣兒有人要今春賣兒空絕叫兒無人要棄路旁  
哭無長聲聞者傷朝見啼饑兒蜷縮暮見橫屍饑鳥啄  
食兒肉飽烏腹他人見之猶慘目嗚呼兒棄安能已獨  
活枉拋一縷心頭血嗟哉兒父何其忍思親兒在黃泉  
等

賣薪兒 勸貪天不可爲功也

賣薪兒躍如雀朝朝擔草街頭鬻奢心欲望桂同昂果  
然百錢沽一束水多草少烹不熟安得勞薪燃敗穀那  
知天順薪兒心癩雲又落經旬霖草價頓增加倍貴十

錢一斤薪不賣薪兒得錢市酒米醉飽對雨心更喜

賣穀賈 勸荒歲宜賑隣朋也

桂如薪米如玉去秋水爲災今春雨更酷買人攤錢向  
市頭共道堆金不如穀壟斷收盡倉滿盈坐待價昂方  
出糶果然春來穀不廣價高一日三倍長賈得錢多會  
豪友不醉無歸夜聚首一席糜盡百民膏轉喜錢來非  
不偶貧兒一斗欠一錢訴殘窮話賈不憐吁嗟乎痛癢  
伊誰保命全不將冷眼看眉燃

賣蓆兒 勸施棺木免暴露也

城南義塚多於堞城內死人棺是蓆一張蓆錢二百賣

席小兒情何適笑看擡屍人不絕有錢買蓆蓆作棺無  
錢買蓆委溝邊安得仁人掩埋穴屍骸不使狐犬食

賣牛農 勸勿宰殺耕牛也

去秋水浸田家隴嘉禾不足來春種十家農人九家饑  
禾淹草亦無茸茸今日賣牛牛莫悲無草何以救牛饑  
牛多價賤市屠悅市屠牽牛牛不活可憐力盡餘年老  
恩全一命難祈保知他戀主心痛酸一步一聲一頭掉  
農人得錢哭聲高來年麥地滋蓬蒿有田無牛耕坐廢  
安得麥長齊牛腰不如買牛且稱貸秋收再償富豪債

樹皮餅 勸勿拋棄五穀也

樹皮磨末爲香料團黏作餅人應笑那知無食飽妻孥  
欲誑饑腸此亦妙嬌兒不食樹皮餅哭牽爺衣放不肯  
慰兒且食保兒生賑饑來日開官廩子弟莫學膏粱兒  
粟朽視與泥沙等兒不見隣家老媪不厭粗黃皮裹骨  
形骸枯啖餅如啖花肉豬

賑粥廠 勸仁人急解倒懸也

聞說粥廠設南廟饑民多於羣鴉噪肩摩絡繹競奔波  
一齊都想爭先到那知籌畫不定期餓待三日仍空竈  
日不再食腹旋饑嗷嗷慘聽哀鴻嗷官長分俸苦不足  
苦勸豪富捐斗斛豪富迂緩誦時日猶誇濟衆存陰騭

坐飯謠

于源

富家有米陳倉爛富家有財豈肯散饑民更比饑鴻多  
結隊成羣來不斷清晨坐到西日斜空腸輾轉鳴雷車  
黠者就中肆搶奪一鬩便足傾一家東坐飯西坐飯王  
店鎮上人至萬昨朝給錢巷柵裏百十七人踐踏死

紀災詩

道光  
辛卯

曹惠馨

秋大雨

道光辛卯秋八月淫潦爲災徧吳越最甚杭嘉湖三郡  
同漂沒江南災如何二十三州縣大雨接江漲湖河莽  
一片鱗鱗瓦屋洪濤掀樹梢蕩漾蘋藻繁哀鴻嗷嗷飛

不已杭州高土乃爰止

金纏臂

金纏臂貴人妻左扶頰白翁右挾玉色兒百口半道殮  
家屬祇子遺袖底出纏臂易食充朝飢此邦有遠姻不  
識何巷居聞道大官朝有令不許入城護出境

買水

城南屍官令瘞屍未瘞先自斃腸穢蒸滋疾癘有客昨  
自淮甸還屍浮支港蟲蝟蝟居民不敢飲遠方擔水直  
百錢

乾柴貴

杭州自燕巖陵柴吳下烹燂足稻稽稻稽無獲柴價貴  
竈婢搵淚煤盈頤雨復雨兮幾時嘆豆麥已盡草又爛

海荒

樵以山農以田漁人以海皆其天天欲奪之命海歉無  
魚蠡島中十船殘一船黑風莽莽嘯水仙鹽竈疲丁更  
告我滷筒不足官盆煎

質鉏犁

質鉏犁無異質我身身老猶可鬻鉏犁一質何以生飢  
腸隆隆賣盡兒子他無長物祇有此質庫錢空不復質  
歸荷鉏犁淚如水

截米艘

皇帝聖仁憫窮黎子蠲子賑無或遺小吏索賄怒且詬  
大戶輸粟力已疲卻羨江南民復業荒政醞醞日建設  
川楚米艘入境截噫吁嘻江南幸遇林先生少穆杭州  
米價何時平

炊麩粥

頻年積潦麥歉秋麩值亦昂匪易謀炊以爲糜暖浮浮  
姊一甌甥一甌義兒一甌吾與嬌女同一甌溫生舉室  
如披裘嬌女那知飢寒迫半甌未飽呱呱泣時復牽衣  
索飯食吁嗟女兮汝勿泣橋東老婦面如墨欲覓麩皮

不可得

後紀災詩

道光 壬辰

錄五

又

秋雨寒

五日雨一日晴有日不雨亦晦冥自秋徂冬百五旬八月早寒天雨霜晚稻方華短穗僵冬至以後九九雪春花胥爛農命畢

質庫閉

方今之大患貴錢而賤穀年荒莫恃錢何所糴菽粟錢貴穀亦貴坐令羣生蹙百物無穀水絕源競趨質庫謀糴殮質庫乳民若母然日日蚨飛子不還主人束手呼

閉門

食稗桴

瀝豆渣羅麥麩糠團覈麪屑榆昔以禦窮今則無祇向  
春坊乞米稗桴已罄遭詎啜劉薦桿棘口瘡薦胥破臥  
凍塗

母棄兒

鬢角女總男做衫不掩背赤足牽母行趨趨道逢餅  
肆視眈眈延佇欲乞色若懸倉皇覓母母去遠明晨駢  
死古巷南

道枕殮

朝來小市二丐斃暮間通衢殍三四棲流所匱凶器空  
乃舉兩身併一樁魂兮升天莫爲厲丈夫餓死等閒事  
質庫論

有質有贖庫噓有質無贖庫閉無質無贖庫閒凡三變  
而成世火伴告主翁無已且讓利吁嗟四民若爲計故  
物胥罄新未置自今但願年年豐有贖無質質庫空

哀道殣

謝元淮

四郊野哭哀烏烏聲何樂道殣誰家兒狼藉殘溝壑餓  
死肉不肥空腸見藜藿惻然傷予懷慘怛淚雙落爾魂  
仇烏鳶予心恐狐貉一坏具錫封遺骸得所託嗟爾蒙

缺人耐此凶年虐乘輿濟涉事爲惠亦已略

紀災行

夏之盛

終歲雨滂沱春無麥秋無禾旣無麥禾并無稗稗道殣

日多

解一

米肆屢增值糲一升錢半百僧居奇廣屯積

饑民食大戶食罄穀數石大戶穀罄哀鴻安適

解一

朝

鬻女暮鬻子子女別爺孃牽衣索果餌子爲奴女爲婢

努力耐鞭箠差勝饑餓死

解二

墮祭出郭門餓夫垂涎

視粟而奪之去如駛追不及亦已耳人且無食矧爲鬼

四

雜糧口勉糊田主忙徵租隣田尙餘稻幾穗乞兒

偷割顆粒無相逢野老同歎

解

飢民

林壽春

昨從邗江來飢民徧徐州咸云黃河洩田園蕩洪流骨  
肉飽魚鼈屍骸渺難收死者誠已矣生者將安投忍飢  
已三日一飯不可謀呻吟臥草間行與鬼卒儔誰能庇  
大厦俾無凍餒憂

盜賊盈州里紛紛半飢民廬舍蕩析飄泊剩一身飢  
寒無所歸頓作穿窬行皇仁非不廣按口給帑銀焉  
能如春草常沐雨露恩爲盜固當死爲良豈能生生死  
不自保何憚國法尊

國朝詩鐸卷十四終